

濟北晁先生雞肋集序



雞肋集左朝奉郎秘書省著作郎充秘閣校理國史編脩官濟北晁補之无咎自名其所為詩文也夫物有質者必有文文者質之所以辨也古之立言

者當之乎居論說諷詠應物
接事不能無言非虎豹犬羊
之異也食之則無所得棄之則
可惜其雞肋乎故裒而藏之
謂之雞肋集元祐九年二月旦
日序

濟北晁先生雞肋集總目

卷第一

古賦

卷第二

古賦

卷第三

辭

卷第四

古詩

卷第五

古詩

卷第六

古詩

卷第七

古詩

卷第八

古詩

卷第九

古詩

卷第十

古詩

卷第十一

古詩

卷第十二

古詩

卷第十三

古詩

卷第十四

古詩

卷第十五

律詩

卷第十六

律詩

卷第十七

卷第十八

律詩

律詩

卷第十九

絕句

卷第二十

絕句

卷第二十一

絕句

卷第二十二

絕句

卷第二十三

挽辭

卷第二十四

上書

卷第二十五

罪言

卷第二十六

河議

卷第二十七

雜著

卷第二十八

雜著

卷第二十九

記

卷第三十

記

卷第三十一

記

卷第三十二

銘贊

卷第三十三

題跋

卷第三十四

序

卷第三十五

卷第三十六

序

離騷序

卷第三十七

卷第三十八

策問

策問

卷第三十九

卷第四十

策問

春秋雜論

卷第四十一

卷第四十二

春秋雜論

西漢雜論

卷第四十三

卷第四十四

西漢雜論

西漢雜論

卷第四十五

唐舊書雜論

卷第四十六

唐舊書雜論

卷第四十七

唐舊書雜論

卷第四十八

唐舊書雜論

卷第四十九

唐舊書雜論

卷第五十

五代雜論

卷第五十一

書

卷第五十二

書

卷第五十三

卷第五十四

奏狀

表

卷第五十五

卷第五十六

表

啓

卷第五十七

卷第五十八

啓

啓

卷第五十九

卷第六十

啓

祭文

卷第六十一

卷第六十二

祭文

傳行狀

卷第六十三

卷第六十四

墓表

墓誌銘

卷第六十五

卷第六十六

墓誌銘

墓誌銘

卷第六十七

卷第六十八

墓誌銘

墓誌銘

卷第六十九

卷第七十

釋氏贊疏

釋氏贊疏

濟北晁先生雞肋集總目

終

濟北晁先生雞肋集目錄

第一卷

古賦

求志賦

釋求志附

夢觀賦

坐愁賦

坐進庵賦

濟北晁先生雞肋集目錄 終

濟北晁先生雞肋集卷第一

古賦四首

求志賦

釋求志附



幼余不自知憊兮願求古人而與之游高平邑於
大野兮魯東鄙而北鄒固余心其悃款兮求前聖
又不遠豈無鄰莫可與謀兮冶邴氏而俗泮幽離
房誠不忍兮棄此而莫能歲執徐之青陽兮余先
子乎東征橫武林之大江兮睚始寧之南邑路會
稽以周流兮求歷山之所在管封嶠之世守兮以

後夫而致刑越懲恥於夫椒兮進樵女而抑心懿
二臣以國霸兮卒焉異夫出處行束薪而自言兮
妻不忍而求去助申威於司馬兮卒隕聲以淮南
盱訴死於婆娑兮悲綽約之亦殲彼章陳之詭嘯
兮旣聘貽於甲夜何仲御之清激兮而亦云駭夫
觀者紛回穴其莫識兮泮千載而迹陳息苗山猶
若茲兮又何悲乎曲水惟鄭公之志約兮逢神人
焉靡求山岌岌而谷紆兮風瀏瀏乎旦暮耿吾何
不可畱此土兮竊悲越人之襍豈其食鮭而化音
兮無所用吾之綏冬矇矇其多雨兮夏痺熱以生
蠹溪水之淺深兮舟上下而擊石吾遵夏蓋之山
兮聊以觀乎遠海吾先子之初服兮羌董道而不
改小人之有心兮猶不假器末余從於東安兮依
哲人而聞誼蜀蘇子之有屨兮漢遺化而多儒往
者其不可及兮曷不從子之廬朝余食乎山中夕
余宿乎江上悲世俗之近市兮余安能忍而與之
皆往余令樓季爲右兮使王陽前余世解纒而馳
石兮緬余得此坦塗良吾輟使環澗兮密吾牙使

撲屬攬九州而顧懷兮夫安知余力之不足邁余
生之罹閔兮歸將母乎故都伏里門而畏鄰兮幽
獨守此四隅時命大謬兮吾廷廷欲何之慨永夏
之宜養兮霜夢然其萃之增歔歔以啜泣兮殺身
其安可宇摧榮而藩穴兮雀鼠去而不舍憺四序
之不淹兮春藹藹其旣菲攬卉木猶若茲兮吾獨
不聊此時悲予仲之婉孌兮饒其心以詩禮吾不
能操贏而坐閭兮耘東山而自食歲旱曠而不雨
兮螟又生余之塲屬歲秋之有穀兮河出墳而湯
湯於陵子之終褊兮井上李其猶飽服芬芳而潔
腹兮夫豈不足以忘老衆虎豕而好朝兮咸得時
而的纏持衣裘而鬻暑兮余固知余賈之不售息
遐舉而莫從兮心紆軫而盡傷訊黃石以吉凶兮
基十二而星羅曰由小基大兮何有顛沛旣非初
志之敢期兮曾何以知其所繫類清濟以去垢兮
芝九莖而爲華宵倚楹而悲詫兮疇獨憂余之無
家蕭苑候之慷慨兮孰云非食之故濟澶淵之靈
津兮橫中流而颺怒息城闕之挑達兮勉踵夫管

之人羿之志於穀兮亦反求夫余身小人不知學
禮兮畏罪罟之所尋宋七世之炳靈兮皇純佑此
下土舉賢而授能兮哀煢獨此黎庶牧羊而肥兮
式亦用夫有闡辟雍之洋洋兮宇干日而糾紛連
衽以成雲兮汗而爲雨豈余不足於同門兮獨惆
悵而延竚先事而後得兮惟其食者之責舉九鼎
於鯢淵兮亦人假夫一臂余張子之好脩兮蹇博
大而無朋雪霏霏而宇凍兮松柏不改其青固黃
子嘗語余兮曰此是爲明月雖工師不以佩兮保
厥美亦未艾彼嗶咿爲已甚兮羌浮石而沈木子
雲之好患兮亦衆諱其寂寞虞氏之爲政兮舉五
臣而與言彼霖霖之射谷兮何足以容江潭之鱣
衆不察余之情兮求余初猶未沫超孤舉而遠尋
兮唯夫不足而論世良恫韓而成漢兮皓保惠而
悟高成功則去兮曾何足以介其一毛融躬行旣
卒驕兮禹服義亦太靡陳輜車與棗馬兮桓榮亦
齒乎富貴蕃居室其不理兮滂之志以四海允膺
之激烈兮羌不以生而昧義意豈弟神所嘏兮固

何以罹此之不祥豈其莫忍鄰之摔兮紛救鬪而
得傷嘉林宗之善裁兮要成敗以不失寧遵不知
時之可爲兮行漁瀨以畢世喟嵇康之蹈盡兮愧
孫子其安補阮清舌而咎目兮潛固自識而遠去
謂道不可爲兮爲者敗之衆窳然咸不畱兮惟至
人焉在之泮千祀而語鄰兮孰與至人之服意神
龍之乘雲兮吾欲從焉以足士生各有遇兮吾何
爲侘傺乎此時曾藿菽不足以化兮求余身其庶
幾滋蘭以旨蓄兮菊以爲糗修忠信以抑躁兮夫
安知余時之後圖前聖吾永賴兮攬百子與竝輿
時翱翔於道與兮歷年歲以爲娛

釋求志

求志自敘也予從先人寓鉅野又從先人仕會稽
又從先人仕杭余仕於澶仕於魏而後仕於大學
故求志所敘如此高平邑於大野謂高平鉅野縣
也魯人好文學而獨邴氏以治富魯人所以去文
學趨利者以邴氏故也是見地理志貨殖傳離房
別房也揚雄云芳酷烈而不聞兮不如襞而幽之

離房武林餘杭也始寧上虞也歷山舜所耕也封
嵎防封氏禹執而戮之者也夫椒吳所棲勾踐之
山而西施蓋樵家女二臣大夫種范蠡信威司馬
者嚴助也曹娥父名盱章陳云者章丹陳珠二女
巫夜祠詭嘯夏統見而驚走者也而仲御亦嘗見
賈充叩舷吳歌致風雲予怪之仲御夏統字也苗
山卽會稽山曲水永和諸君所集處鄭弘遇神人
於若耶溪云願旦南風莫北風夏蓋上虞海旁山
名自此以上上虞事東安杭州新城也予始見眉
山蘇公於杭故云未予從於東安兮依哲人而聞
誼樓季古善御者王陽不馳九折坂者也予自謂
至此乃知學之所趨猶出荆棘險阻得大塗而息
驚也環澗樸屬考工治車說車君子之器車工而
後可以致遠君子修而後可以涉世自此以上新
城事將母故都予喪先人歸濟時也予仲無斃也
東山濟東郭予所田處比二年不雨河決卒不獲
於陵子於陵仲子也虎豕猶參差見甘泉賦趣市
者平旦側肩爭門而入日莫之後掉臂而不顧故

云衆虎豕而好朝謂干時者也世所用卜靈筮者
曰是爲黃石書始予免喪占之繇曰由小至大無
有類沛予自謂非予志所期也類清濟而以芝爲
華以况余不敢汙以干時倚楹魯漆室女中宵悲
嘯鄰人疑其欲嫁者也蕭望之嘗爲小苑東門候
自謂各從其志予莫之澶淵予爲掾時事挑達予
教授北京時事予去北京爲太學正故曰辟雍之
洋洋鯢栢九淵名舉鼎九淵非一臂力然一臂亦
有助也張子予太學同舍文潛也文潛不苟合於
人黃魯直爲明月篇遺之曰天地具美今生此明
月陞白虹兮貫朝日予愛之浮石沈木無是道也
而誣善者其言嘗類此大才而小使之譬霖霖非
鱸所游也求斯世而莫予知也則思古人焉孟子
所謂是以論其世也故曰惟夫不足而論世自恫
韓成漢至潛固自識而遠去皆論世之事也馬融
張禹驕靡栢榮以車馬夸弟子皆不足言陳蕃范
滂王允李膺李固以忠殺身亦可傷矣夫惟無心
於爲者爲能爲天下張良四皓所以成也知其不

可而不爲則若林宗淵明可矣有光武而嚴陵去
之非也遵陵也阮籍在晉人中頗能自濁口不臧
否人物而爲青白眼殆矣故曰阮清舌而咎目也
餘子儻攘小人之中如捧土救河潰卒與之俱溺
豈不痛乎故曰爲者敗之懲數子之爲而敗而不
知時之可爲又蔽矣而予又不足爲也故終欲求
之予身

夢覲賦

歲闕逢之涖灘兮前日至而匪息夢啾耳之薨薨
兮翦青蠅其狂楫咸南徙而未逝兮遺其矢如散
絲余俛避而不汙兮一媪背之淋漓眇不知其可
穢兮偶竝趨於西帷媪左目之穴枯兮萍四五其
萃之旁兩媪之無言兮亦依帷而靡期朝怛寤而
自診兮營營發詩而可知蹇俱翔而遺矢兮技止
此其奚爲惟一盲而兩默兮與目萍爲何機豈眇
視不足與明兮萍非寄而終離羌何爲而眈此兮
神無心而罔私拜受神祥兮編之冊詞文女三之
爲姦兮比匪人而惡之微夫周公之爲見兮迕若

此其衰欲微福則安敢兮問故老其增疑苟不
汚爲已免兮謝三媪之難知

坐愁賦

魯人閻子仲武行年七十四躬耕於鄙歲早不入
而色藜藿促鼓其琴作坐愁之聲嘗所與游晁子
補之恐其傷也爲作坐愁賦假翁與過者語以解
之其詞曰

彼何人而處廓兮匪三閭而獨醒鬢毛毵其雪糝
兮眸子瞭其星明塊獨守此中野兮困無禾而爨
清拂素琴之浮埃理坐愁之遺聲忽推几而睨天
送飛鴻之杳冥或過其前曰有心哉然何求管林
類之行歌云旣老而無憂翁年運而德加翁何爲
乎坐愁翁偶顧而若聞猶援琴而不捨曰子非魯
之儒服者耶何以不知漆室女者晝輟絃而淫息
宵倚楹而悲咤彼淺哉其量人匪魯憂而欲嫁豈
不誤耶吾亦傷夫魯之君子管在厄而不糝賜自
殖而何誅顧欒軒而中紺羌同道而恥茲迺長饑
乎回憲彼林類其何人雖信賢而獨善或者曰未

既也請言翁之近者管蘇門之遯民緇枯桐之一絃匪無絃之寂默異五絃之啾誼對阮子惟長嘯爲稽生纔一言人欲怒之戲排諸淵勃宰而出則又粲然彼何知夫坐愁幾躑躑乎樂天矣然聖人猶以謂樂天有憂之大者也况憂人之憂豈有既哉於是翁泛然可油然謝曰憂樂外矣吾當虛之

坐進庵賦

有物于此無梁無柱圓廣六尺非困非窳粟米之宅上蒙藁秸下履瓴甌塗墁晦外中腹純白平時鼠竄俯仰不迫主人惰學敢謁之客客曰此夫外丘阜而內穴谷者歟上荷笠而下湊輻者歟首枝撐而身純束者歟有登降而無阼寘者歟混沌既死竅鑿乃張牖則有目戶則有吭檜巢營窟太古所藏周旋無間病於德方邑都莫賢原野則良者歟雖然可以五人羣居宇宙有餘不可以八口次且孰知婦姑彊名坐進其實中虛聞諸博識是謂屠廡

濟北晁先生雞肋集卷第一

濟北晁先生雞肋集目錄

第二卷

古賦

北渚亭賦

是是堂賦

北京官舍後梨花賦

後招魂賦

披榛亭賦

濟北晁先生雞肋集目錄終

濟北晁先生雞肋集卷第二

古賦五首

北渚亭賦

北渚亭熙寧五年集賢校理南豐曾侯鞏守齊之
所作也蓋取杜甫宴歷下亭詩以名之所謂東藩
駐阜蓋北渚凌清河者也風雨廢久州人思侯猶
能道之後二十一年而祕閣校理南陽晁補之來
承守乏侯於補之丈人行辱出其後訪其遺文故
事塵有存者而圃多大木歷下亭又其最高處也

舉首南望不知其有山嘗登所謂北渚之址則羣峰屹然列於林上城郭井閭皆在其下陂湖迤邐川原極望因太息語客想見侯經始之意曠然可喜非特登東山小魯而已迺撤池南葦間壞亭徙而復之或請記其事補之曰賦可也作北渚亭賦其詞曰

登爽丘之故墟兮睇岱宗之獨立根旁礪而維坤兮支扶疎而走隰踰琅邪與鉅野兮梁清濟而北出前炭漫而將屯兮後崔嵬其相襲坏者扈者嶧者岫者巖者礪者障魯屏齊曰惟歷山或肺附之箕拱環連勢厓絕而脈泄兮萬源發於其間谷射沙出漫淫漑澆潏汨泌澎淖渤滴忽瀼起而成川經營一國其利汾澮防爲井沼壅爲碓磴得平而肆迺滉漾而滂沛經民間而貫府舍兮渚爲池之千畝惟守之居面巖背阻邈闔閭之遺址兮肇嘉名乎北渚悲經始之幾何兮牛羊牧而宇顛非境勝之爲難兮善擇勝之爲難嘗試觀夫其園千章之藪合抱之楊立而成阡躋歷下之岩嶷望南

山之孱顏脩榦大枝出欄造天藐祖岫之蔽虧乍
髣髴其雲煙息僊人之樓居尚輕舉而高飜盍駕
言其北游登斯渚而盤栢岡巒忽其翔舞蒺楊眇
以如箸撫千里於一睎收城郭乎環堵其下坡湖
汗漫葭蘆無畔菱荷荇藻蘅荃杜蒹衆物居之浩
若煙海歲秋八月草木始衰乃命習習觀漁其睢
鳴榔四合方舟順涯鱣鯉窘乎淡塘兮鴻雁起於
中泚復有桂舫蘭柁浮游其中榜歌流唱自西徂
東纖餌投隈微鱗掛空客顧而嬉傾盃倒鍾明月

出於缺嶺夕陽眇其微紅天耿耿而益高夜寥寥
其方中駭河漢之衝波披海岱之冷風恐此樂之
難畱兮願察槎乎星渚期韓終與偓佺兮采芝英
乎瑤圃庶忘老而遺死兮路漫漫其脩阻於是酒
含太息中座語客曰自管太公奄有此丘是征五
侯栢公用之攘狄尊周方其盛時山河十二號稱
東秦臨菑遨樂中具五民秋田青丘實囿海濱而
薛又其小邑也區區之賦食三千人其彊孰與比
哉觀華不注竭其孤巘虎牙桀立芙蓉菡萏尚想

三周追奔執鞶下車取飲僅以身免困責質於蕭
同尚何私乎紀胤而齊自是亦不競矣夸奪勢窮
雖彊安在事以日遷而山不改則物之可樂固不
可得而畱也認而有之來不可持所玩無故去何
必悲此齊侯之所雪涕而晏子之所竊嗤也今我
與客論古人則知迷屬有感而歔歔豈不重惑也
哉仕如行賈孰非逆旅託生理於四方固朝秦而
暮楚曾無必於一笑尚何知乎千古於是客輒然
喜再拜舉觴而前曰凡主人言理實易求而我曠
然已忘咎憂使客常滿使酒不空請壽主人如漢
孔公主入亦輒然喜受飲反觴執客之手而言曰
詩固有之未見君子憂心忡忡既見君子云乎不
樂再拜洗觴而酬客舍然大笑

是是堂賦

是是堂彭城劉子羲仲之所作也劉子讀古人書
則曰文王我師也周公豈欺我哉處今行已則欲
就有道而正焉抑荀子所謂是是非非謂之智者
以名其堂而居之而南陽晁子補之聞而疑之曰

劉子果於自信果於不信人也哉夫理無常是事
無常非使天下舉以爲非而劉子獨曰是將誰使
取正使天下舉以爲是而劉子獨非之安得力而
勝諸嘗與劉子問津於無可無不可之塗而弭節
乎兩忘之圃夫安知吾是之所在故賦其名而連
牴其義則操吾戈以伐我者遠矣其詞曰

隘區中之無覩兮邈荒忽以遠求軼太始以爲元
今日與月之幾周本獲鼎之推筴兮四千歲其已
多謂過此或不遠兮世倏眴而謂何紛蛇身與牛

首兮詭變化之莫原神與民其雜糅兮或傳之於
余先川東南而辰西北兮余不知其何故惛絕維
與折柱兮又孔氏所不語莽湯草之相質兮駭一
世以共疑一身吾不自識兮疇莫覲而能知遭吾
輶乎八埏兮旋吾舳乎四海斬不死之遺氓兮稽
吾聞之所在曰七聖至此而競迷兮羌誰使之正
女媧輕舉而遠游兮吾將從巫咸之所處離屯雲
以衛屬兮前犇霆使抗旌王良御以踰躔兮何鼓
隱其砢磷涉橫潢而櫂淹兮借斗車而轟轟九虬

蜿以承綏兮六鳳翼而繽紛載格澤而雉厲兮歛
若撇捩捐旬始而遺撓捨貌無朋吾孤往兮騰光
景之所經俯六合以周流兮觀一氣之所營叩溘
湟之何居兮問黔羸所休屯芒東西之無軌兮沕
晝夜之無門追汗漫而與言兮若不見而不聞將
下車而從之兮則竦身而遐征忽寐寤而莫質兮
形欺魄而獨存神黜掩而載浮兮涕淫夷而霑襟
聞佞僞之達者兮將與議夫本根斲乎保已而不
失兮何足與論此之至神鵬南徙而終息兮彼安
知夫天地譬井蛙之跳榦兮吾亦安知其孰智謂
道非物之外兮盍反求諸世間泮得失之兩塗兮
一智者之足明世溷濁而智鮮兮薪得鹿而國爭
曰吾不知孰是兮據有鹿而偶分待黃帝以占夢
兮曠百世而莫尋雖人跡之所至今如窮北之衣
皮聞中國之有蟲兮咀葉飽而吐絲化草木之所
染兮煥五色而陸離所不睨而懍怛兮咸莫信而
我非饗香以爲朽兮視素以爲黑有迷疾而慮易
兮意是者之反疾衆謂西施美兮何高舉而淡潛

魚熊掌以爲羞兮帶螂蛆之所甘物各驚其所知
兮孰爲是而正女蹇多知而博辯兮盍質諸魯之
君子曰經禮三百兮曲禮三千非堯舜禹湯之適
兮爲他道而勿傳守株以待兔兮卒不可得從女
以決疑兮而增余之惑規吾觚以轉圜兮如二兒
之干國權謀旣不用兮仁義又見賊哀失時而齟
齬兮改此度誠不能陳瓊茅以潔中兮愬神龜以
吉占朝從而莫違兮吾安所行女意王倪蹲循乎
不知兮齧缺昧曹於同是違一世何不可兮山澤

又多龍虵淡林杳以無人兮雨雪雰其來加前夔
魑後虎豹兮獨狒笑而施施石嶙嶙嶢嶢以增波
兮路阻躑以委移結幽蘭以獨立兮歲將暮而增
唏懷同心之離居兮悵猶豫而狐疑必處廓若此
而後可兮雖濟百世何足以嬉譬鄙夫之硜硜兮
經溝瀆其誰與懷古人之兼善兮吾不忍抱吾之
所獨五官異用兮物各派吾之一以聞聞性兮一
非有異回車易野兮絕道九州吾旣不從夫斯人
兮盍反吾之初修闔萬宇以聚閭兮載百族與並

游人羣固有倫兮生固有涯蠶桑而被兮粟以禦
飢吾何以異於人兮曾跼蹐而支離伯夷死名兮
盜跖死利溺者入水兮拯者亦用以顛沛曾稽失
之未暇兮羊固已遠去而千里重曰道無封不可
畔兮雖千歲由今日忘彼與是兮吾何愛嫉棄虛
無以爲輿兮託不得已以爲鄰忘處石而出火兮
超同物而獨生

北京官舍後梨花賦

梨於經無記而舍後梨人所不賞故賦之其詞曰
攬察草木本原所起李梅紀於隕霜兮橘柚隨乎
織筐木瓜足贈而詠詩含桃可羞而記禮雖信微
而有託兮亦不委夫厥美惟茲梨之俊茂兮羌獨
遠而未揚含溫潤之秀質兮皎若和璧榮其光澹
暗慙其無偶兮歷年歲之已長算春者陽瘳憤盈
羣木解膚似夸者似鬪者似韞者似頰者色非一
色同嫵殊媿茲梨娟然獨見其素繫過時兮不省
滋脈脈兮後戶亦何必耀榮華兮朝日顧猶私兮
泫露然而中唐之樗枝大扶疎以其近人人以繫

駒則磨則齧則折則泄孰與夫朽壤幽薄厥植雖
弱履屐不蹈根乃磅礴

後招魂賦

屈原作大招魂宋玉作招魂夫士以忠放濱於死
故招其魂而復之予交之長者王安仁賢且孝適
未仕病以天子傷焉不敢以非吾上也借不知命
之辭以愬于帝作後招魂

竊悲夫天何爲生此碩人兮蹇幼清而宜脩旣服
義以時可兮又何爲委厥美而改求天固復諸其

初兮則如勿俾此昭質帝命巫陽曰有愬于下汝
往聽之精神將離筮而復之巫陽曰物死與生司
命有職自廢自起朕何能識帝彊之乃下招曰魂
兮歸來去君七尺之軀胡爲乎大陰些舍君之靈
龜而糟葶沈些人固懷慈而抱愛兮一言欲訣而
怵怵些君胡樂誘於異物兮從之踉跂而遠行些
魂兮歸來上天不可以游些有神當關其視畏人
些其下百鬼伺人往來執而殺之些徜徉無所倚
歎息不可些幸而得還無所求階些歸來歸來不

九
可以久放些魂兮歸來地下不可伏些土怪墳羊
狠戾突觸些蛇身鬼首蓬髮髻鬚當前搖毒些九
幽之府惡厲牛首得人以械獄些歸來歸來不可
以久屈些魂兮歸來無止乎山中些山木蕭蕭後
狃所居些藜藿柱逕梟祥龜怪杜鵑號呼些夔魍
罔兩笑風涕雨見人挪揄些虺虎封狼磨牙吮血
侏侏穴居些魂往顛墜狂惑失途些歸來歸來久
幽恐不得出些魂兮歸來君無下海些大海盪瀟
日月回周些白波連天五山狂浮些巨神操蛇唯

魂是囚些淫氛瀰霧八方錯易魂往安投些百怪
謹舞羣出類沒更遨迭遊些霹靂掣電蛟龍直起
江潮逆流些有鳥九首載鬼盈車擢筋以縻其軛
些歸來歸來久淫恐不得還些魂兮歸來君無樂
兮八蠻九夷些遐方異類其人似禽些烈陽慘陰
鞬裘裸裎涼溫不時些蔽林夜祠被髮徒跣妖魅
叢嬉些魂往非族抵冒凌欺些歸來歸來恐自遺
羞些魂兮歸來君無以髑髏爲南面之樂些毛枯
骨化精離識落些螻蟻所寄鳥鳶所搏些蚊蚋姑

十
嘍狐狸齧嚼些
競然七孔捷擲疇覺些
棘薪葛蔓
交錯綿絡些
鋤耨野火侵凌甚虐些
歸來歸來無
自遺賊些
魂兮歸來八紘六合無一可以翱翔些
魂孤迂迂消耗淪亡些
歸來歸來反故鄉些
工祝
前君無迷方些
崇城兩溝夾高楊些
車軫馬駢交
康莊些
日中爲市集工商些
高門懸箔襲慶祥些
選閱甘旨薦北堂些
金昆玉季美雁行些
斑衣竹
馬兒嬉傍些
曲欄橫牖窈洞房些
長蛾曼綠含若
芳些
齊紈阿錫曳明璫些
戛瑟鼓簧封豕羊些
食

前方丈醲椒漿些
嘉賓雜坐紛賢良些
朱顏欣欣
君樂康些
魂兮歸來反故鄉些
亂曰
龍火頽坤兮
虛正宵萬物酋勅兮
傷秋郊汨君徂征兮
默誰曹
天地爲鑪兮
物流以銷一受成形兮
巧專莫逃斯
彌頤輅兮一體所交
鼠肝蟲臂兮忽何遭
魂知復
吉兮改而超與君
除祓兮三下招張君之衣兮
升
屋號魂兮歸來居匪遙
無哀我心使予勞

披榛亭賦

舒陳儀甫官於魏覽觀公圃廢城之堞墾其土作

亭堞上名曰披榛斬木枝爲梁柱管蒯衣之目踰
四垣矚五里外進客而語曰樂哉此亭客曰微主
人言之固願有謁也今夫山居者遺世遠舉煙霞
之府屢屨之顛翠微之顏穹石曲鳴上正宛中如
堂如防猱獲之所處首更奔星高出雲霧足蹈太
虛下見雷雨邈乎杳冥一攬九土此人以登邑門
之埳蹤步齟齬若絆若禦若見陟櫓遊意無所至
於平原案衍秫麥之土漫漫漠漠茂有堆阜下澤
之車短轂幘爾晝日旁午出汗霑滑此人適逢沙

丘宿莽廣不蔭路怠而願息解轡弛負相攜偃僂
忽如飛翔延頸顧慕矣若廼平時室處矇矓環堵
窮年不出四壁爲伍周以闔閭域以牖戶如彼井
谷潛逃之鮒衡從北南適在跬步仰而視之不識
天宇此人出城而望見桑麻綠野猶將樂之况乃
矗乎巍巍據城之陴出屋之危前無蔽虧俯首而
窺哉夫明不求晦處內慕外各以其不足所遇生
貴雍門之技悲者驚心鍾儀見繫尚猶南音主人
殆倦遊窮居者耶不然何以趨然於此而志意洋

溢也嘗與主人周覽五嶽岱嵩衡霍巫廬九疑白
鹽赤甲青城峩嶠歲暮深林攀援桂枝結軌羨門
高谿方駕赤須安期委區中之跼躄遊太上之無
涯則主人樂此耶嘗又與主人服織離騷騷耳夸
父前蔡魯陽奉轡超人跡馳萬里以觀乎八紘九
野觚竹北戶與西王母日下之地扶桑月窟紫淵
丹水大章所步盧敖所履殊方怪物齊諧之志焜
煌譎誑經目而記則主人樂此耶嘗又與主人觀
乎京洛神州宋魏兩都未央建章天子之居前殿
武庫金闕玉除東華耀靈西華望舒複道氤氲飛
閣渠渠千官鏘鏘劔佩以趨朝會而出冠蓋布途
富貴潤奴絳衣食仁里閭則主人樂此耶嘗又與
主人技術孫吳抗技頗牧左象弭右魚服韓厥中
御州綽爲右馮軾而寓目以觀三軍之斬伐擊刺
琅琅磕磕風起雲會北登燕然躡轡長塞西屠石
堡飲馬瀚海麒麟圖形贖死胄代則主人樂此耶
嘗又與主人出咸陽經上蔡過邯鄲桑中大隄石
城之間士女亟會倡樂止客盃酒相索吹竽鼓瑟

鳴箏擊筑六博蹋鞠宛珠之簪傳璣之珥羅裾從
風衆曲入耳人生得意亦何能已則主人樂此耶
主人油然而笑曰人壽幾何而時易失細猶不果
巨安可必淡山大澤實生龍蛇高明之家鬼瞰其
室吾非以狹驕廣以儉笑侈也狹易治儉易供此
吾所以樂也寤秋九月狐狸出穴宇宙隆冽時亦
登吾亭而支頤藜棘之分披朱實之離離秋風鳴
枝久而不去羣竅盡奏若歌若歎起左作右時亦
杖藜隱几而聽之寂寥兮無爲淡乎熙熙似遺已
離物而不知飛鴻滅沒夕陽就微月出埤垠樂而
忘歸則客亦樂此乎哉於是客曰我以衆夸主人
而主人以少奪我主人賢哉非僕所及也

濟北晁先生雞肋集卷第二

濟北晁先生雞肋集目錄

第三卷

辭

望渦流辭

追和陶淵明歸去來辭

返迷辭

冰玉堂辭

漫浪閣辭

遐觀樓辭

樂哉侯之邦兮樂哉侯之堂兮

二章美澶守韓侯也

維夫君兮桂舟一首送梁正受歸汶陽

山坡陔辭

白紵辭上蘇翰林二首

江頭秋風辭

琴中宮調辭

濟北晁先生雞肋集目錄

終

濟北晁先生雞肋集卷第三

辭

望渦流辭

渦之水西流過譙郡北乃稍南又東流入于淮包
渙二水皆經其南以東歲旱深不五尺秋雨集始
大而城之東北惟渦曲水深黑灌木蒼然舊有祠
曰龍嘗宅焉作望渦流其詞曰

望渦流兮浼浼勢南折兮東還水衝隈兮岸圯嗟
龍去兮幾年俛余進兮藂祠儼帝服兮神冠牆壁

續兮怪奇泯虵穴兮蝸盤列缺鞭兮雷輶衛兩鰻
兮驂鱣老龜起兮霧游跂瑋瑁兮鼈龜或若馬兮
非人紛陪後兮導前木陰陰兮藻長科斗舞兮下
顛儵羣出兮旅嬉忽俱去兮不還意土國兮無龍
恐逃桷兮藏櫪帝有命兮時棄亦隱隱兮填填世
鑠石兮流金將誰職兮此愆包之水可揭也渙之
水可厲也前汝足其暨也後汝跗其躡也江有鯢
兮橫淵海有鯢兮翔天汝隘此兮往爭滔滔水兮
八埏重曰望其厓若有宅於隈不汝爭於厓汝安

其隈澤不必施也

包渙二水與渦竝流

追和陶淵明歸去來辭

辭長而歌短歌有和辭無和也言語文章隨世隨
異非擬其辭也繼其志也作者七人矣詞曰

歸去來兮吾無以歸奚以歸旣身不足以任責畏
首尾而心悲慕往咎之經世嗟吾力之莫追彼辭
位而灌園豈吾今之獨非雨冥冥而荷笠榛莽莽
而褰衣我行野而視天覺寓大而身微乃矜蚩蚩
止驅息奔背隍築室面坂植門三綬從褫圖書尚

存忘瓠落之可憂比浮海之爲樽躒太初而游意
弊無極而彫顏反國蝸而自足俯巢幕而亦安解
予轡之沃濡兮脫予牽之間關識鳥鳴而物華陶
陽氣以流觀悟息淵而消枝亦堙戶而俱還惟文
字之幼工則雖老而栢栢歸去來兮彼河濱之善
游或往學而喪生復裹糧其安求善陶生之達情
不與世兮同憂實迷途其已遠懼斯人之莫疇或
待兔守株或遺劔刻舟雖成事之不說聚悔踰於
山丘庶西方之至言聊反聞而逆流守一靜而爲
君亦何往而不休已焉哉一晝一夜成四時子之
歎川遊不畱顏光不可使東之韓終王子喬汗漫
難與期俯寸田之荆棘曷不且耘而莫耔悲在堂
之蟋蟀慙不樂於唐詩悟死生之如夢亘今古而
無疑

返迷辭

五達跂行者迷茨菘蹊蚘蜴嬉杳淒淒莽離離赫
隆曦可還時日黯西與誰期往不思逢詭期死獨
貌安可知亟反之大道夷都邑差車馬馳冠劔祇

志可持能足施貴名坐好爵靡儼罇卮饜梁肥窈
室帷安厥妃觀盈虧浩浩移逝不遲咸若斯何綏
綏不返爲從魑夔神索衰今狐疑後當悲我此詞
如泰龜

冰玉堂辭

冰玉堂者始前門下侍郎眉山蘇公子由哭故廬
山隱君劉凝之與其子道原之詞所謂潔廉不撓
冰清而玉剛者也鄉人聞之其賢者喜其頑與懦
者皆廉且立則相與採冰玉之語以名君堂而祠

之而前起居舍人譙郡張文潛又因其名以爲記
蓋君父子博極羣書道原尤精史學而皆耿介守
義不偶俗以沒世慕而傷焉故門下以謂夷清而
餓死惠和而三黜道不與命謀非和實得非清實
喪而起居以謂司馬談與遷文學美矣而無聞於
風節疏廣與受風節同矣而無傳於文學蓋門下
至借君父子以論夷惠起居合其長謂過漢四人
者以是知君父子爲一時知名偉人所愛而推之
無間然者如此則夫冰玉之名非鄉人故舊者之

言也天下之言也補之生雖晚猶與君父子並世而不及識旣爲館職修國史實錄盡得道原所著十國紀年資治通鑑外紀諸書而觀之且門下補之所嘗事而起居所嘗游也因其言以益信顧雖不及識與夫識而知之者自以謂淡且遠矣又與君之孫義仲游相好元符中以罪遷玉山道出星子求君父子所葬而拜之五老巉然臨其上水交流其下松柏一徑如幢節行路耕者咸指而言曰此劉君之葬也則皆有敬容因喟然太息順塗而

訕曰皎皎白駒在彼空谷劉君於是無愧乎天下之言矣旣而復曰屈原以讒放而死而君父子進不犯難退而伏清節以沒與原異於原不更愈乎推此志也雖與日月爭光可也况冰玉乎哉凡楚人之詞皆傷夫中正不遇者而作也故以若詞弔之曰

論世以觀士兮集義以爲詞所非正而敢從兮日可望而東之嗟若士之弗獲兮羌何忿而負石繫聖賢之出處兮惟遵道而守德鳳覽輝而乃下兮

雞猶恥乎腐嚇非九方之爲使兮夫何足以得馬
廬岑岑以鎮楚兮洵大江之東淩分陰陽之晦明
兮鍾斯人以正直惟天道與地寶兮非所求其猶
愛與之全而不用兮懷斯美以固在大固不可以
適兮方固不可以圓試回功謝於土穀兮夫乃同
道於禹稷譬人生猶吹呖兮無得喪之可齊紛吾
何指以爲正兮服吾初其庶幾

漫浪閣辭

南康劉義仲壯輿志操文義蚤知名於士大夫年
四十矣而學問亦苦蓋不欲一日棄其力於無用
也築屋廬山其先人之居自號曰漫浪翁意以比
元結從仕與物皆不得已也豫章黃庭堅魯直曰
壯輿未至於翁行已立志不可謂漫浪者潁川晁
補之无咎以爲知言壯輿曰請極其義補之曰唯
其詞曰

沛高皇之受羸兮劉別子曰楚元羌好詩而說義
兮敬設醴於穆生戊始怠而穆去兮申白笑而鉗
市富傳孫而失國兮派辟疆之支子爰清淨而少

欲兮以身悟乎霍光蹇孫向之洽聞兮至耆老而
彌良曰衆賢和於朝兮萬物和於野粵百世而能
調兮民胥來而鳳下惟劉有後於楚兮千歲發夫
道原流其芳以益遠兮偉壯輿之不愆原惟博而
好直兮向異世而復起輿惟進而未已兮載向學
亦不墜彼元結之信修兮羌何爲此漫浪也將履
中而晦外兮其德固天之放也惟漫浪之爲言兮
匪正則之嘉名豈其懲屈之死忠兮欲倚移以保
生結當易之一爻兮幽人履而正吉輿方壯而惡
畫兮棄爾輔欲誰賴吾語子漫浪之可兮遺物往
其庶幾苟畏人而羣於人兮拭唾面其猶殆朝騁
望乎紫霄兮夕歸次乎左蠡五老兮在上星子兮
在下垂瀑介於高丘兮洞深林而北靡飛梁亘於
三峽兮倏異景而殊世青松屋兮桂宇辛夷房兮
梅戶蘭糗兮菊粳蓀體薦兮肴若芳雲駟兮霓輶
歲將晏兮誰與游煙爲衣兮水爲珮君誰須兮林
之際吾以漫爲旌兮建彼太虛之上也吾以浪爲
藥兮周彼八荒之外也狃萬里而不逢人兮御謁

我以宜止晷轟轟而曠洶洶兮羌何以辯乎明晦
彌高出於千仞兮羣鳳過而北南彌幽徑於雷室
兮列缺驚而後先求佞僑而不得兮咸勃宰其在
下乃山澤之臞兮夫何足以跂而望我茫吾不知
其所如今黔羸告我以何舍出無陰兮入無陽旋
丹崖兮匝大荒忽臨睨夫故居兮羣梯危之蜂戶
偃白叟之扶童兮迎謂我以良苦返吾稼兮復吾
樵山嶸嶸兮江滔滔與先人之善俗兮雖百世猶
未改彼魯衰而斷斷兮吾老穉以知恥匪禮失而
求野兮民固化於不怵與克家而好常兮庸謹行
以毋傲懷向原之遺直兮念爾祖而履薄陳洪範
之九疇兮敘三統與七略以爲博而弗考兮蹇無
用而束閣紛輿世之多賢兮匪曲全而好修惟仁
宅與義路兮羌可居而必由結信賢而自晦兮忘
其同物以迷世鳧與波而上下兮夫固非駒之所
喜亂曰接輿詭而悟聖兮匪沮溺亦楚狂聖與言
而莫顧兮人以爲知乎大方旣不足用吾中兮吾
將從回憲之所臧

遐觀樓辭

窘牆堵之伏潛兮登斯樓以遐觀匪吾居之爲隘
兮乾坤習其盂盤仰攀薨而拊楯兮宇曠曠而益
寬彼何大而能舒兮吾何眇而莫閑霜肅壟而木
枯兮潦收竇而澤乾蓬鳴野而相追兮知海冰而
天寒左睇兮城闔右盼兮林垆商賈紛其晝合兮
陶冶翁其煙興之杲杳以在東雙柏近而青青物
暇遽之不同兮余亦不知其何情聊浮遊以相羊
兮初怫鬱而中清彼塊北之無垠兮人駒隙之暫

更道本夷而世險兮夸奪饜而卒平周垣兀其跨
衍兮逝千古於樵耕春與秋之不淹兮歲忽忽其
崢嶸招搖指於北陸兮澹黃宮之陽生固天道之
反覆兮氣默會而孤萌朝卷箔而極望兮稍霧廓
而日晶及暘景之方中兮晞余髮乎南榮浮雲起
啾而赴楹收百爲以清慮兮施余袂而榻橫漠洵
洵而非聲兮邈冉冉而非征形欺魄而若存兮神
無虧而靡成目矐矐而罔覲兮坐待日之方升夜

寥寥而未央兮羌不寐而無營

樂哉侯之邦兮樂哉侯之堂兮

二章美澶守韓侯也

樂哉侯之邦兮封楚宮與復關美哉洋洋水兮崑
 崙始乎并川桐離夫其實兮綠竹兌於丘園三年
 庶夫有成兮蹇吾師其永歎營室壁而建墉兮參
 國一其可觀塗椒丘吾駕車兮攬予駢之嘽嘽襲
 予旆之悠悠兮侯降觀其于田春陽滿其親天兮
 乃物作而芄蘭來吾省夫在疇兮介黍稷之有年
 侯寧般于遊兮無非事而不煩羌信修而好我兮
 曷懷歸而翩翩信侯邦之可樂兮蹇攜手其同行
 樂哉侯之堂兮高門桀兮蘭錡切雲冠之峩峩兮
 四牡矯兮戾止夜悠悠其未晨兮紛侯庭之徙履
 雲容容而承楣兮日澹澹兮階屺雨雪覲其將流
 兮黃宮動乎子美爰俶生之煌煌兮又尚茲夫介
 祉嚴若植其姣服兮侯何須兮堂際進蕙幃予稱
 觥兮芬予席之蘭茝朱顏忽其滿堂兮五音昌兮
 來會蘋姑射之綽約兮愿懿保而為使洵侯堂之
 可樂兮與日月其無圯

維夫君兮桂舟一首送梁正受歸汝陽

維夫君兮桂舟酌余酒兮攬君留君何爲兮此野
菊菲菲兮蜨下鞞鞞兮煌煌爛金敷兮襲余堂茱
萸兮芙蓉衆芳越兮亂五風飢咀兮靈芝君歌樂
兮余和之日下兮野陰澹忘歸兮中林橘棟兮梅
宇紛瓊茅兮被南榮白羽兮黑翮邀僊人兮語此
文余高馳兮世之外君焱舉兮先余至襟帶兮東
方旦爭門兮汶之陽大野兮始波翔鶴鶴兮嗥鴛
鶩羣宿兮迷陟旅食兮殫穗霜肅肅兮葉方下君
欲濟兮淹回水通道兮躩蹠冠如箕兮帶長鋏里
千室兮士一喙余不善兮紛余諄世謂折揚好兮
余白雪而莫知棄火布而以爲垢兮胡不浣炎而
振之彼鑊邪而能言兮工謂余以不祥聊逍遙而
挫銳兮蒙黯黹而益光

山坡陀辭

山坡陀兮下屬江勢崖絕兮濤波所盪如頽牆松
鬱律兮其高百尺旁枝虬驚葛藟之仰不見日兮
下可依吾曳杖兮吾僮以吾之書隨邈余望兮水

中泚頎然而長者黃冠兮羽衣軒頤坦腹濤石箕
坐兮石亦有趾安不危四無人兮可忘飢僊人偃
佺兮自言其居瑤之圃一日一夕兮飛相往來不
可數使其開口而言兮豈惟河漢無極驚余心默
不言兮蹇昭氏之不鼓琴憺將翔兮山海與日月
兮常在若有聞兮夢中仇池我歸路此非小有兮
噫乎何以樂此而不去咎余遊於葛天氏兮身非
陶氏猶與偕棄渺莽良未可兮僕夫悲余馬懷聊
逍遙兮容與晞余髮兮蘭之階余論世兮千載一

人猶竝時歧又有歧兮余行詰曲欲知余者希我
我洋洋余方樂兮譬余擊舟於水魚沉鳥揚亦不
知何必每念輒得應余若響坐有如此兮人子期

白紵辭上蘇翰林二首

白紵焚莫緝紉蘭作衣祛朝兮日所暴算兮雨所
濡木瓜諒微物期報乃瓊琚芳華辭甚妙贈我不
如無

上山割白紵山高葉撼撼持歸當戶績爲君爲絺
綌不惜潔如霜畏君莫我卽誰言菖蒲花可聞不

可識

江頭秋風辭

雒陽客後車結駟傳燭食人生富貴不易得江頭
秋風旦夕起胡爲翩翩雒陽陌雒陽陌吹塵埃江
頭樹安在哉秋風起菱花開鱸魚肥歸去來

琴中宮調辭

神僊神僊何處青山裏白雲際不似人間世源上
正碧桃春清溪乍逢人住無因憶紅塵出洞花紛
紛

卷二終

濟北晁先生雞肋集目錄

第四卷

古詩

擬古六首上鮮于大夫子駿

西北有高樓

東城高且長

亭前有奇樹

冉冉孤生竹

涉江採芙蓉

車以理生年不滿百

建除體二首荅魯直

八音歌二首荅魯直

感寓十首次韻魯直

西歸七首次韻泗州十五叔父

感興五首次韻李希孝

飲酒二十首同蘇翰林先生次韻追和陶

淵明

濟北晁先生雞肋集目錄

終

濟北晁先生雞肋集卷第四

古詩

擬古六首上鮮于大夫子駿

西北有高樓

西北有高樓縹緲齊紫清周欄十二折飛鸞結丹
楹上有絃歌女充耳以黃瑛當窗弄白日顏若茗
之榮陽阿奮哀響梁欐有遺聲不惜厲清商零霜
飛園英誰為聽之者皎皎自知名幸承遺襟眷同
車以遐征

東城高且長

東城高且長下瞰阡與陌谷風麗百草春華紛已
白良時忽如此馳景一何逼喟彼飯牛詩終年守
寒阨恭儉夙所敦葛屨傷褊窄身爲物逆旅生乃
遠行客豈無百日蜡樂此一日澤美人顏煌煌奇
服爛五色彈箏奮新響盃酒縱相索鬪雞逐狐兔
六博呼一擲貧士悲失職坎壈何所迫安知黃鵠
舉隨時振六翮

庭前有奇樹

庭前有奇樹好鳥鳴喈喈朱榮被紫萼采掇以忘
懷棄置而不省秋風淒以摧不惜朝華算君行殊
未來

冉冉孤生竹

冉冉孤生竹託根中谷卑結髮事君子江籬近華
池江籬榮有時迨此春冰期玉盤有嘉餐思君以
忘飢棗下何纂纂朱實亦離離秋風一披拂苑其
爲枯枝願垂太陽惠照妾葵藿微

涉江采芙蓉

涉江采芙蓉江上零露滋方舟不能度日算白蘋
悲清波有鳴鴻蕩漾安可期幸因南風逝寄言欽
所息

生年不滿百

生年不滿百一日何三秋花開苦多雨何不張幕
游行樂時不再春榮豈長在古人輕尺璧愚者昧
所戒君看龍與虎飄忽不相待

建除體二首荅黃魯直教授

建策移漢都奉春綠衣布除地願見公乃以舍人
故滿船載明月且復酌清醕平旦襪襪出牛羊下
來算定境要兩言出處非竝趣執臂欣逢迎秋蘭
在堂下破甑雨生衣蹇不改茲度危莫如人心難
莫如行路成事安得悔來者其可悟收拾不須陳
千言一棄屨開門見井市終歲紛遑遽閉門面牆
壁少日豐暇豫

建鼓求亡子初昧學所之除去日月多及此歲未
遲滿國和巴人若士誰與知平陸不推舟客行當
來茲定居厭屋廬風雨勞所思執鞭慕管人孰與

並此時破裘不御冬要假完腋裨危言則來詬慎
密又逢譏成德尚如是薄志安能期收聲復藏熱
雷火忽然微開口且復歡是事置勿推閉眼可內
視獨復不自爲

八音歌二首荅黃魯直

金蘭况同心莫樂心相知石田罹清霜念此百草
腓絲看煮繭吐士聽憤悱語竹馬非妙齡美人恐
遲算匏繫魯東家今君尚天涯土膏待陽瘳氣至
如咄嗟革薄不可廓士迫下流惡木無松柏心竭
處螻蟻託

金丹妙通靈子有遺世術石髓不成餐閔予多滯
骨絲聲紡事算搗聲寒事來竹葉將菊花及時同
一盃匏器祀天地貴質不貴華土緣井渠繁生氣
泄大和草面固非性小人變丹青木雞本無心風
雨安所能

感寓十首次韵和黃著作魯直以將窮山海
迹勝絕賞心晤爲韵

鳴鳩興獨居百兩誰與將未見憂忡忡旣覲爲龍

光吹竽沸齊市零雨暗空桑寒歌牛軛底激烈氣
彌剛

雁以無能亨鼠以有技窮古來達生者神不馳其
胸物或似而非藁本奪芎藭臧否何間然吾師阮
生風

倉鷓知陽春喬木聲關關白駒不食苗奈此空谷
寒簪有丹徒士檳榔貯金槃富貴懷隱憂無寧歸
故山

吾期瑤之圃玉英良可采崑崙在萬里積石更磊
魄學經儻無用詩禮發含非叢臺尚何爲袷服若
煙海

鼓吹出西羌光華動眉額韃橐望酒泉面有可憐
色念身匪兕虎少日四方迹百計等畫蛇老大悲
故國

謝公文章餘幽事課伐嶺清詩如玄酒胡乃淡而
永得無西堂夢春草句彌勝但使田野傳何須論
銘鼎

江南盛鬱蒸代北紛霰雪卞生無出游何以得此

別一朝有天運春華未萎絕吾猶託雄鳩而彼固
不拙

平生莫逆交弦斷寄心賞相思望青楓目極江水
上念當及時節農事動春壤來者不有年何能咎
吾往

楚有吹竹者工作百獸音削格爲爾多滔滔寧適
今嘗俾範馳驅終日無一禽復之儻或可詭遇亦
何心

葉公好畫龍龍固不可晤安知下其室驚駭暗楹
霧昭王亦買骨冀以得馬故相者競舉肥終然駒
遠去

西歸七首次韵和泗州十五叔父

潔腹不受污管人因食薇薇亦周土生悲哉懷永
飢武王與周公聖德天動威奈此二子何猶歎安
適歸

霏雨晚霑裳零霜曉被路驅車歎時邁所遇一無
故悠悠天地宇萬物各有聚闕我冰雪姿幽居從
可住

六
莫投古店宿夜聞狐狸嗥僕夫告行邁起視月尚
高
清霜來何許不覺滿我袍逆舍良非時求前茲
已勞

浮雲如游塵倏忽蔽白日登高念搖落歲暮一何
疾東陵種瓜事富貴寧可必人生無南北行樂時
易失

驅馬馬走山回車車漸水塗窮我何適慟哭盈襟
淚巢居識風聲穴藏知雨意救鬪曾得傷纓冠亦
可已

贈君彼風蘭佩之可爲璫贈君彼露荷製之可爲
裳薄言茲擷掇道遠莫置傍崢嶸又歲暮與君同
所望

古人重生男豚酒慶親戚桑弧射四方言有四方
役奉璋比德性墮地要膂力如何晉公子安樂忘
所適

感興五首次韵和李希孝

海鳥御羊角飄然凌紫清有背如泰山未覺毛羽
輕鹽陽亦羣飛日景爲不明空倉自苦飢安得有

此名

人生須富貴如埃河之清草木競榮華春服亦已輕桑田自足樂未可居高明君子順天道小人眷時名

長歌遺世情滄浪之水清鑠金在衆口折軸由羣輕君子貴同塵安事皎皎明儻在子所呼牛馬亦我名

不肯埽一室顧欲天下清少日又不羈頗復鄉黨輕長年始羞悔耳目尚聰明何須更市藥小女故知名

春半寒未已今晨天氣清彈冠適新沐搔髮亦良輕但愛百鳥樂復憐一窗明千世寧可期歸耕良近名

飲酒二十首同蘇翰林先生次韵追和陶淵明

少賤足可喜險阻更嘗之爲親謀斗粟無意出競時緬焉効一官報國方在茲寧當不卹緯對酒懷憂疑學道恨力淺中遭世網持

沈飲非荒宴凜然忽頽山或人欲問事已醉不能
言古來亦如此名字垂千年但問酒中適豈計飲
者傳

陶公羣於人而無人之情詩豈世外語世語不可
名東坡憐此翁同調但隔生形光來戶屢真處人
不驚得酒自醒醉放意無虧成

園林日夕好花繁時鳥飛少年玩芳物不飲成坐
悲只今未白髮念管已依依紛華戰吾道決勝當
有歸挫銳培其根外槁中匪衰念方終日行輜重
安得違

一眼異青白口語來啾喧酌一不酌一用意何其
偏誰似子孫子高栖蘇門山時隨嶺雲出又與林
鳥還平生但長嘯獨爲嵇生言

高賢衆所懷衆理應取是如何濟衆事難成復易
毀功成身無與天運亦復爾軒裳役羣愚兒曹眩
文綺

庭前兩古柏凌霄燦其英問此誰榮枯雪霜見其
情榮枯何足計有酒還自傾熟寐暫展轉覺來一

蟬鳴歸休但如此便足了平生

功名有天命美好無定姿雲夢未足吞聊可巢一枝同時金門士文學多瑰奇僕被向淮海酣放遽爾爲車蓋豈不榮野馬不受羈

城東故鹽渠自咎誰所開似說全盛時邈焉一長懷穿渠引江水此計未爲乖千帆競算入集浦如鳥栖萬疇分白浪嘉稻擢新泥恐此太多事且當寄嬉諧疏通養魚鳥花柳共低迷時時載酒往江上亦忘回

大明唐來寺廢苑西南隅青松拱高阜崎嶇有微途肩輿病我阜一馬良可驅衆木媚淡壑氣隤時雨餘此焉可數醉何用葺吾居

蘇公士冠冕復似郭有道知士未達間趣操保耆老精鋼試九火勞倦容不槁爲州第飲酒况此年歲好藏鋒避世故輕敵喪吾寶時來用毫末勳業自世表

東漢有兩士才智炫一時三公往訪事臥病亦見辭偉明獨不然小道安取茲斯人似水鏡與世破

昏疑憂國不爲身百世邨可欺舉盃相歡屬是事
亦置之

齋居忽若遺不識身與境頗疑酣中似奈爾輒復
醒東坡自云然挈世一裘領是事吾有師安敢囊
出穎指窮火已傳豈待得薪炳

安昌漢耆儒樂飲侈亦至東坡儉不固少飲得徑
醉愚敢効戴崇正復息其次旁通獲親愛公亦安
所貴便坐時一卮彭宣寧寡味

幼聞錦江春欲訪子雲宅叩門問奇字便埽四方
跡青雲看一鶚凡毛愧累百勞公諭伯業齒堅頭
未白何當擺俗累歲月可惋惜

王道無偏黨此語聞諸經高賢如大海亦以衆流
成文饒歎維州刀鋸人所更相如後私怨此語驚
秦庭小人慮事疎妄意鹽車鳴安得如江酒洗我
塵垢情

淮南夏早收晚秧亦含風連艦似雍絳千斛輸吳
中使君飲酒樂歲美關梁通安得天下人俱忘楚
人弓

十年一麥禾此歲亦難得寄語吾州人不飲良大
惑經時無死市吏責亦可塞先生門弟子佐守同
一國舉孟日相屬有句安得默

堂堂門下公英發自初仕卷舒固以時出處不爲
已朝廷登儒輔德禮民有恥岷峨更崢嶸清風在
閭里獨醒固不惡旣醉又可紀成王訪落時百室
賦盈止吾儕爲國謀私愛不足恃

黃子似淵明城市亦復真陳君有道舉化行閭井
淳張侯公瑾流英思春泉新高才更難及淮海一
髯秦嗟予競何爲十駕晞後塵文章不急事用意
斯已勤平生不共飲歎息無與親問道伯昏室何
人獨知津各在天一方淚落衣上巾歸休可共隱
山中復何人

濟北晁先生雞肋集卷第四

濟北晁先生雞肋集目錄

第五卷

古詩

視田五首贈八弟无斁

卽事一首次韵祝朝奉十一丈

謁岱祠卽事

游信州南巖

北京水後往棣州試進士

次韵王宗正定國與蘇翰林先生黃校書

魯直唱和

次韵孔著作常父館中喜雪

次韵文潛休日不出二首

次韵文潛病中作時方求補外

再次韵文潛病起

濟北晁先生雞肋集目錄終

濟北晁先生雞肋集卷第五

古詩

視田五首贈八弟無斃

河流之所濡一斛泥數斗我莊當水窟乃比石田
瘦尚無東陵瓜況有南山豆天雨不可期且復鞭
牛後

蘇秦不願印迺在二頃田東臯五十畝力薄荆杞
填擇高種苜蓿不溼牛口涎拙計安足爲朝往而
算旋

薄遊廢家務待子營糗糧莊奴不入租報我田久
荒凌矜馬到門碑兀牛臥場立苗蒼耳根此策殊
未長

家世不爲農長安有大第官糧弗克口萬里聊自
庇一從學聱牙世事百色廢賣牛姑補屋歲晚霜
雪至

居貧廢文字銚鋤學苦耕怪子獨伶俜久與地力
爭苦耕又不時狐虺日縱橫高原一釋耒歎息心
怍怍

卽事一首次韵祝朝奉十一丈

平生交游情獨處不可乍邨爲一馬飲濁水噴百
馬弦歌高樓上但恨知者寡丈人遺世心口語儻
能借不然抱幽璞終歲裹幘屐坐令青蠅繁暫出
刑兩踝儒冠成自誤歸去無屋瓦賴逢里中賢築
室各蕭洒及時秫麥賤樽酒得同把安能效乾沒
肩與市人亞居然邑里號曾墨爲還駕况在竈與
間欲恥王孫賈東方錢二百得米稚啼嗷嘲笑坐
窮辰無肉飽伏假尙聞剝啄聲聊復屣屣迂子常

妙工詩蘇李掩曹謝有時醉醅醕大笑翻盞學倒
床鼻息惡喚起對殘燧復古志尙奇衆競方獨暇
捫蝨與人言豈不逢譴訝崇朝潔腹坐往往食旁
舍子固業少成議論媿風雅嘗聞莊生說乃慕巨
魚化平居似晏子志念能自下而我獨迂疎通人
所譏罵正賴觴詠中得意自陶寫畱連接清晤欲
起不能罷是時春雨餘桑密鳩鳴野城隅園圃近
欵段亦時跨便恐百卉闌晚晚侵朱夏人生形骸
累未免俗情詐此理豈外求猶煩詹尹卦清風穆
然在如渴啗甘蔗況我自散材谷口躬耕者去年
秋不在匏瓠緣庭架低回迫榮利妻子憐王霸橫
經亦彊顏已取或人捨但慮宰我愚松柏談三社
翛然一室內黃卷開佳話尺璧競寸陰寧復當論
價吟哦愁肝腎蟋蟀吊長夜鄙俚頗近情持用自
悲詫功名與道義熊掌偕魚炙二事良難兼夫子
賢點也

謁岱祠卽事

澤南三百里極望橫天雲雲端色凝黛諦視初可

分崢嶸介丘像頽洞元氣屯頃刻有變化慘澹殊
明昏天行帝出震其位生物元不周僨西北川乃
東南奔寧知六鼇死竟使二山淪不有是難傾孰
維大塊根嘗聞周官說實惟天帝孫神靈所鎮守
民物斯芘存幽明昭一理有道惟常尊不覺下馬
拜僮奴亦蹲循迺知正直理足使冥頑敦三王有
損益商人所尊神明法或不懼夜行安得遂以此
輔世教庶幾驅驚民算宿太平驛不眠慮絲棼明
朝好天色萬象開胚渾勢橫恒碣盡支壓齊魯蹲
五色冒日觀一握通帝閣恢拓下摧確青蒼上氤
氲泉石競沮洳煙嵐互紛綸高舉躡風海深蹒跚
火輪濤波卷堆阜一一溟渤吞棊枰視井邑七箸
藏松椿碧瓦峙雙闕紅牆繚長闔願瞻巖闕客內
滌邪垢魂賜臣登絕頂一覽神秀原萬壑射窈窕
三壇矗嶙峋莽不覩項領何能窮眚跟稍稍指鳧
繹依依數亭亭云松列大夫爵羸識將軍墳瑣屑澗
花麗霏微崖藥黥廣大良有以奇險安足論瑰詭
有形上頽然德彌惇得無希夷子倣世逃深藁亦

有黃冠士相對如麀麀此曹噉草木語道良未聞
解榻坐中觀洗心馳大釣形氣要得一不然隨物
泯是事亦姑置幽尋聊可勤初疑無字碑瑩潔誰
敢文又怪玉女井高絕何由齋俯穿鬪仙巖鳥下
天壁垠側度五賢堂熊經背逡巡劔石危數履女
蘿柔屢捫揮斥八極遠風來袂軒軒廖廓自無梯
猶疑天可賓陰谷不敢視恐落魑魅羣安得遂獨
徃身如黃鵠翻周流遍五嶽採掇芝英繁卽欲憩
圓嶠或當止崑崙衆真迎我語一笑顏玉溫是中
差可樂子胡戀塵樊荅此太遺物身閒猶事君重
華迹已遠秦漢事方煩成功屬吾宋五禮垂後昆
皇帝二載春臣備太史負紬繹自帝典頗識康哉
言泥金白玉字願頌無前勳有志類韓愈無書愧
文園臣髮將雪素臣心猶日暎今此在林藪跳身
同獲猿徒觀衆山小愁絕下天門

遊信州南巖

南巖夫何爲山作天倚蓋山南豁山腹飛頂覆其
外初如鵬將翔膺擊羣麓背乍似海大魚呀口噉

而嘖當空橫廣額架屋喉舌內仰窺駭憑凌俯進
愁壓陸嘗聆釋氏說仰覆各世界千間未可著五
畝良不隘清冷氣射人熱惱從此潰崖奔木疎瘦
谷遠鳥幽怪問僧何年居投老四五輩問客何人
來官滿或一再而予與二子高興偶相戒松舟下
清江毛髮數鰕蟹藍輿上峻嶺幢節望杉檜李侯
勛門胄文采山作繪趙君儒林孫媿美蘭結珮不
爲城郭遊繼月此于邁寧知老逾拙意在精賞退
得居溪南山食飲與山對夔魑入奧突雲雨出巾
襜古人戒賤目慣覩誰復貴顧此誠未逢欣然與
心會彭湖兩崖感泉作一線霈禪月古臺空靈山
自明晦搜奇獲三勝趣嬾同一慨但憂久聱牙尙
喜無帶芥平生所驅使詩酒俱好在天涯得吾侶
物外從所快便欲登赤城一觀天宇大

北京水後往棣州試進士

晡時北京城行李上客槎二更無人聲騎馬黃河
沙誤緣柳灘中尋炬知田家道有轉徙人襁負依
丘麻雞鳴不安枕髣髴墟里斜秋瓜抱子母蕎麥

亦已華賴茲野物登爾輩生有涯夜宿冠氏驛旅
衾魂夢嘉明發縈長坂晚開堂邑衙秋陽此方熾
流汗霑巾紗處陰甘吾願聊逸豈在多有風東北
來慘慘飛雨加頃時異晦明稍矚天表霞僕夫爲
我言塗梗絕行車且還解吾褚中林侶羣鴉詩書
維永夕蚤作從復賒豈不有王事奈此僕夫何

次韵王宗正定國與蘇翰林先生黃校書魯

直唱和

東國寬市征西山休騎屯時清詩人喜洗濯出佳
言淵源蘇夫子河入莆菖翻軌轍校書君駕驂盜
驅奔後來得濬冲它人孰窺藩譬余學禮素婦祭
盛於盆不應麾門牆尚許酌衢樽夢天九門開燦
然列星繁羣公顧我喜顏若白璧溫赤城何足躡
愁絕永嘉孫

次韵孔著作常父館中喜雪

冬旱及茲雪都人銷百憂牆根有宿草餘綠尚去
秋新陽解薄冰大潤升介丘夜聞窗響紗高雲正
綢繆明旦天津望寒花翳川流宮中聖人喜癘氣

一夕收史占上日祥知欲遍九州敢任肉食謀官
閑欣歲休雖無山陰船窮巷窘若囚却幸葛翁來
湯餅有麥牟見神仙傳孔侯金閨彥平簪慕追遊延閣
排霄起登臨忘我愁何當聯轡環城苑佳氣浮春
郊日可望桑野聽行謳

次韵張著作文潛休日不出二首

張侯經濟術見遇未容心揚子執戟老蔣生開徑
深予亦拙造請素懷愛園林閉門鳥雀喜朝日上
駸駸

文史平簪契淮山別離心省中竝日直天上青春
深買屋近城塢往來成竹林詩模黃著作作吾亦意
駸駸

次韵文潛病中作時方求補外

貧爐初著灰濁酒寒不溫鄰張病未來獨負南窗
暄昨日往過之歡喜能兩餐醒醲泆然解愧無枚
乘言祝君抱虛一邪氣襲無門今晨有起色迎笑
眉宇軒扶掖兩男兒總非佳弟昆遣誦寄我詩妙
可白玉刊平生俱豪氣見酒渴驥奔賜休常苦稀

晨謁良不閑約君向南邦勿厭敲扑誼公餘未忘
飲何必醕十分時平但行樂臥治安足論琵琶五
十面雷雨出鷓絃

再次韵文潛病起

淮浦見之子春風初策名頗訝謫仙人有籍白玉
京晚遇廣文直老交心愈傾同升芸香府偶坐華
髮生斯人自龍性意變難章程耆酒不疵吝身如
秋葉輕自言士處世何必冰雪清交游滿臺省毀
譽半王城不肯効俯仰畏高侮鰥惇常思老伊潁
紫蠚羞吳杭我輒抵掌和音同磬隨笙小人奉慈
親皆嘗小人羹寒衣婦補綻學績女娉婷日欲江
海去心期楊柳青衆木構大厦豫章倚孤撐如子
足醫國可容移疾行丹書紫皇告玉篆五嶽形何
必陶隱居吞霞養純精訪道自素約諧心期算齡
但恐牽俗緣志大功不成息交屏妻子此語不須

驚

濟北晁先生雞肋集卷第五

濟北晁先生雞肋集目錄

第六卷

古詩

玉溪歸逢甥李相如汴中

送學生李公裕兄弟赴省集

次韵太學舒博士堯文示同志

次韵蘇翰林五日揚州石塔寺烹茶

題四弟以道橫軸畫

桂漿

送舅氏楊通直令陽穀

贈王推官允中

之京師展墓

同畢公叔飲城東

題李成季負日軒

次韵李成季感事

同李主簿叔文飲北莊

夏季

曹州道中二首

病起呈李縣令希孝

贈金堤劉承制景文

次韵四弟以道十二弟叔與法王唱和兼

示无斃弟二首

濟北晁先生雞肋集目錄

終

濟北晁先生雞肋集卷第六

古詩

玉溪歸逢甥李相如汴中

蠻鄉俟天形畏蠹復憚暑夢甥來萬里竹響風動
宇如今真似夢相對別恨吐平生窘執轡白面力
如虎誰令斗指日江使墮漁罟桃僵李爲什遺珮
滿江渚常憂抱石死無復腳踏土邨知徼時願起
廢遇明主曠調已遠跡未用矜杜舉但憂世議隘
亡弓不亡楚吾甥學孔子况乃父母魯如聞四門

關未信遡洄沮上書閔魃早膏以神靈雨北海自
有人高丘豈無女爾壯觀爾能吾歸固吾所期甥
二兒上餘子不足數何以喻吾心酌此湘吳醕

送學生李公裕兄弟赴省集

閉門圍火談開戶雪一尺黃昏具盃酒知君遠行
役君家三兄弟頗謂各無敵容父學知方大道通
四驛吉父尤頡頏天池觀水擊仁父少而奇乃是
夜光璧李侯有此子便可臥安席家居樂與餌聊
以止過客豈無一束芻空谷不可食宵人操寵利
徒手捕蜴蜥公等寧復然烏黑鵠自白屠龍業有
用未厭所從僻富貴念管時城東雪中跡

次韵太學舒博士堯文示同志

北門望瀛關一葦初莫渡

頃官大名堯文在高陽

儒宮連案

几會合豈非數蟬鳴幾何時庭菊下白露念當慰
佳節觴酌美無度不然坐歲晚流景急飛兔區區
人一馬官舍勤早算經時枉見贈彌月不能賦竹
齋行茗粥寂莫當屢赴此君安可得霜雪不改故
詩如戰交地高處要先據牛羹君放飴轅鼎吾亦

飲顧慙詠伐檀無補餐已素還家便却埽況乃無
戶屨

次韵蘇翰林五日揚州石塔寺烹茶

唐來木蘭寺遺跡今未滅僧鍾嘲飢後語出飢客
舌今公食方丈玉茗攄噫噎當年臥江湖不泣逐
臣玦中和似此茗受水不易節輕塵散羅趨亂乳
發甌雪佳辰雜蘭艾共弔楚纍潔老謙三昧手心
得非口訣誰知此間妙我欲希超絕持誇淮北士
湯餅供朝啜

題四弟以道橫軸畫

黃葉滿青山枯蒲靜寒水鳧雁下坡塍牛羊散墟
里擔穫算來歸兒迎婦窺籬虎頭無骨相田野有
餘息

桂漿

暑臥午呀呷蠲煩何所投巖桂割辛芳石蜜滋甘
柔沃以火鼎沸閤之冰井幽三日出溪幕明瓊盎
黃流冰火離坎類意比秣麥繆辛甘旣兩適不酒
亦銷憂中年苦內熱歲願西風秋寒涼犯所畏發

散資爾謀時時以觴客三獻不一酬緬思湘纍語
啜醯終所羞北斗酌此漿違世聊遠遊恐復迷吾
往僕悲道阻脩淮南歸來些僚慄令人愁百壺無
此餞夙志慕林丘寧懷小山感不爲桂枝畱

送舅氏楊通直令陽穀

人言慎縣宰頗似太丘君客戶有訓遣司官無訟
聞外家久寂莫舅氏少辛勤一邑何足道高名誰
與羣西來馬特特冬晚雪紛紛公朝道由砥孤士
跡如雲過門苦地僻下直迫日曛淡泥枉窮巷寒
鑪對殘燼感慨說宣子飄零綴遺文麟閣窘鉛槧
魚山失耕芸遠情等匏繫歸夢劇絲棼山東接畿
甸陽穀近榆粉吏咎猛豺虎民如竄麋磨幸逢寬
大時庶幾仁惠薰自笑下士策不殊野人芹愛民
宜百祿本茂實當蕢

贈王推官允中

我生譬天星睨睨但空譽學經羞輪扁常恐老竄
句南游上會稽弱冠肆遠步便當期汗漫如鳥鍛
脩羽入宮又獨晚謠詠遭衆媿坐令平生交室冷

羶不具君公牆東客清鑒美無度風期山水意千
載見此遇定疑丹青仙方我以癡顧豈繫才自疎
閱世真異趣伐柯理無遠要以一馬喻古人本不
死方寸有佳處三年禹河曲日見車馬渡何知謝
剝啄黃土衣易汗無人尚有子獨載城下路功名
喧口實簪組託肺附請看餅罌滿取蹟病不去脫
黏窺本初須子遺所寓怵迫倦東西林間尚寬裕

之京師展墓

短轡馭羸馬馳驅曹濟間商飈折勁木蕭瑟道里
寒況復慕所天惻愴摧心肝游子歎時邁慈母憐
衣單來時憑窗哭五妹垂脩鬟季弟主菽粟孺妻
褻茅菅悼我無令人莫奉堂上歡豈無萱草詩終
日倚門闌念咎常獨立所聞詩禮難我尚未成人
遭罹此憂患歲晏念墳墓此離百哀攢何時奉靈
車辛苦向此還親寡氣力微傍人祝加餐願言薄
志節苟生無形顏

同畢公叔飲城東

西城昔相值桃初兩三紅翩翩鶩長陌春風搖馬

髮後君歸幾日游絮已濛濛解鞍不待憩相命古
原東芍藥雖俗花狂姿幸時供平生於知己千過
不一逢感君欲開口清洩出霑胸君如陶淵明不
爲五斗恭胡爲青綸上朱墨紛外蒙棄官能從我
短後追田翁銅斗釀秫麥竹枝弋鳧鴻何必悲無
衣縕廢聊御冬九辯太高潔五噫苦羈窮置此無
滑和天情反其中市藥非市名名聞藥何庸十漿
饋五漿猶畏聞者從如何艷城畔夜夜生長虹

題李秀才成季負日軒

李自號
天隨子

盧敖遊八極末至北陰墟卒然蒙谷幽覩一奇丈
夫淚注而鳶肩深目玄髭須軒軒迎風舞自得樂
有餘見敖默弗言慢然下臂趨敖私躡其後若士
意不愉曰子亦何爲迷繆至此乎此雖窮荒北尚
或逢日鳥過是有玄關晦墨不可居語竟若欺魄
攝身沒空虛始予讀秦記疑是忽帝徒今聆天隨
言乃與夸父俱逐日下虞谷力窮尚嗟吁陽舒固
物理我亦安于于若士獨何氣幽沈山海隅渾沌
死已久人生信多塗

次韵李成季感事

吾廬無餘他文字散堆案雖微清溪鶴著畫亦幽
玩高人來何疎午榻動成軒夢聞足音喜不待搖
枕喚居貧少煙火餽食尚須盱出門兀何之踉蹌
從欵段吾人古遺隱鳧足閔同患負日持獻君狐
白不肯換商歌叩牛角長夜安得旦颼颼滿屋風
黃葉散投幔楚屈若靈龜出處思過半所從聊自
知何用詹尹算不如天隨生頭幘終日岸況君擊
莊缶一念腸九轉人方臥大室子獨號其畔寒山
來助哭咄爾勿嗟惋

同李主簿叔文飲北莊

蕭條蓍收窮疎樹失穠紺北風動地起雲攬紅日
暗李君邀我游簡款治寒檐相攜二三子歛若符
節勘愧非谷口隱佳會良可暫茅堂兀四壁誰識
此意淡古徑無俗尋陳編有幽瞰一聆君子語梁
肉幾厭啗歸來馬河北寂寞晚舟纜吾生事逃伏
優游亦何憾

夏季

夏季百果繁兔葵亦成實獨有野石榴幽花時熠
熠熠熠非獨好芳榮賴午日翩翩彼白蜨髣髴粗
采挹睡餘起對此嘉興亦蕭瑟良非阡陌麗敢競
陽春出無言以成蹊上愧桃李質幸當飽霜餘萬
顆富君室

曹州道中二首

天旱久不雨四郊多狂風蕭蕭班馬鳴落日大野
中君子守宮廷至樂聖所同喟予不逢辰足跡道
里重

驅馬上高原秋風吹客衣感時有所懷送目鴻雁
飛羸僮惑岐道日暮相際稀愧彼倦翔鳥知還良
庶幾

病起呈李縣令希孝

次公惡醒狂得酒要自濁病聞南隣邀不往亦踴
躍空床成展轉假寐風雨惡中虛氣襲逆妄夢時
可愕每慙張隱居凌旦發囊藥曉來天境清日出
鳥語樂家人語南軒青杏已可嚼復云竹齋前堦
屺有迸籜欣然欲舉手紗帽未能著平生李夫子

相得懷抱廓何當戒長鬚夙駕慰寂莫杯杓恐不
勝快語聊一噓

贈金堤劉承制景文

漆園說海若稷下談神州長劔堪倚天語大世莫
酬少狂豈其然及此日月流稍知畫足非萬事指
顧休夫子更高識未沫於前修蔡流聊復駛得渚
正須畱蓋有幸遇魯何能必爲周徜徉下澤車驚
駭入谷騶對酒尚青眼吟詩將白頭山陰論往事
陳迹詎能收

次韵四弟以道十二弟叔與法王唱和兼示
无斃弟二首

少時勇遊山說山喜動色中年謫南方廬阜得深
歷當時不類謫忘腰帶之適怪人肝鬲異破賊喜
折屐只今竄林下織衣而畊食緬懷茲兩士吾宗
氣相得吾春種桃時子曉尋嵩日似聞黃面子爲
採烏頭出去年陟岱宗一士世莫識天門邀之下
傾倒意已極斯人與人異龍虎兩超忽重尋亦無
路顛雨石崖坼

雞肋集 九
吾人伯仲間一語可物色氣自寡所諧窮乃足所
歷家風藐五世不肯適人適意行無險易又跣不
著屐文詞如苦李慘腹人莫食猶矜不傳妙坐恐
兒曹得學憐新又新老奈日復日伯以最恬愉何
由採之出无斃能寡言猶堪謝前識叔與氣尚豪
搯頤視屋極斯文惡表襮枯魚戒所忽應如魯宮
籀藏壁俟其坼

濟北晁先生雞肋集卷第六

濟北晁先生雞肋集目錄

第七卷

古詩

同劉景文登大安閣

次韵張文潛飲王才元家

次韵范翰林淳夫送秦主簿觀

次韵荅秦觀見贈

北京學直舍對客

虛齋

直舍卽事

昨日雪已佳約李令希孝

同文潛送况之諫議十四丈守潞過成季

作

送梅校理子明通守杭州

送呂承奉至山從呂龍圖晉伯辟秦州機

宜

曉發樓子莊

禮部移竹次韵李員外文叔

次開祖使君韵兼呈端叔大夫聖域長老

次韵錢濟明贈感慈長老

送八弟无斃宰寶應

和關承議彥遠水樂

送君

上馬

試院次韵文潛欲知歸期近呈天啓慎思

栽花招泗州叔父

濟北晁先生雞肋集目錄

終

濟北晁先生雞肋集卷第七

古詩

同劉景文登大安閣

劉侯先將軍忠義當代顯
喑噫指戎虜却走自相
踐西坡坐首鼠勢感不得免
天憐壯士窮有子如
此鮮清時鑄農器文字正
須勉行吟畔牢愁憤悱
亦足遣時來躡雲梯仰視
天宇展下俯河兩涯牛
馬細不辨達生匪行怪未
用驚邑大官閑尚數臨
洶澤要清淺

次韵張著作文潛飲王舍人才元家時坐客
戶部李尚書公擇光祿文少卿周翰大理杜
少卿君章黃著作魯直

霜雪埋百花及時鬪春陽城南有高士買屋入花
藏經時不出門爲花日日忙我居在何許近止東
數坊亦有佳公子連車換帷裳隔牆蜂蝶誼開戶
草木香仙人朱桃椎髮綠童臉芳此公不可見此
畫來遠方竹欹麝廡塢柳拂轆轤床素兒雖小小
亦足侑客觴尚書廊廟具氣若冰壺涼忘年此賓

主吾黨有輝光人生走塵土歲月顏鬢蒼曷不休

沐暇過此薰修房宴坐二十年非癡實難量

王才元未

四十
休官

張戾不出家在家說緣忘尚擬問兩卿攜肴

借紅粧妍歌聽黃子不飲亦清狂

次韵范翰林淳夫送秦主簿觀

高詞自班馬短句亦陰何輸寫無窮已懷山赴壑
波淡耕待銍艾療飢乃嘉禾機雲共一時未信來
者多老病愧羣豪魚山臨東阿蘇公門下客事業
皆不磨孫寶暫主簿靈槎會窮河它年九功敘當

使睦者歌業虞置牙羽筦簫復森羅鏞鐘欠一鐸
未害大樂和却欲從浮海珊瑚爛紅柯龍門雖箭
駛此志未蹉跎丹沙還黑髮流景爾則邨仇池出
一派分江定有沱

事見蘇詩

次韵荅秦觀見贈

修身貴日新如草陳葉換請看絃上矢歲月不可
玩文章得蛙釜虎以皮遘難茲事從古然吾黨奚
獨惋秦君好學勇決勝百馬汗宵行委明月屢得
按劔盼鄙夫晚更事前猛窘新悞憐君亦自嗔意
滿懷不散誰爲傾國媒尚此瓊英粲期君似椽置
無以無人慢

北京學直舍對客

鳥聲落檐間竹色在戶外解屨置几前放杖當椅
背默然仰棟時往與古初會有時遺坐客十問不
一對尚因呼乃覺笑自謝頑昧知非慕遽子事去
等蝸蛭一生所未免飲食與眠睡所以更頽然可
樂本非內有心欲何用橋起則形累賴客同門生
曠蕩乃不愧

虛齋

虛齋閉疎窗竹日光耿耿更無司業酒但有廣文
冷人憐出入獨自喜往還省時作苦語詩幽泉汲
脩綆

直舍卽事

秋雲多重陰凌旦亦可樂虛齋坐亭午寒雨依高
閣王官有憂責霖潦河未落孝先但欲眠不奈弟
子謔黃花迫晚景白露下叢薄獨當慰佳節得酒
自斟酌

昨日雪已佳約李令希孝

昨日雪已佳今日雨亦好冰膚解萬木洗濯見枯
槁息君對此坐孤詠廢幽討明日尚相期春禽聽
清曉

同文潛送况之諫議十四丈守潞過成季作

午投李同年下馬汗如洗城南迫送客雖嬾聊爾
耳出門繚陂渚白鳥起深葦佛宮橫晚霽窈窕間
一水借問客何人諫垣有直氣吾人浮丘伯聊可
與把袂如此邂逅何得酒亦佳事官閒猶有守旋

折窘六轡可憐千紅蕖的纏姹晚市便當風駕行
秋風如箭駛

送梅校理子明通守杭州

金明池上柳人折一枝春贈子意不淺東游雲外
身人生半刺史朱綬光四鄰此豈經世懷但慰墜
白親錢塘我舊遊頗復識其人不應山水改但恐
猿鳥新章臺走馬客冠蓋盡要津竊祿我自慙便
面聊障塵亦思一舟去共醉西湖濱時平自行樂
不爲千里尊歸來麒麟上獻納當及辰

送呂承奉至山從呂龍圖晉伯辟秦州機宜

去日劇奔驥新交非曩圖憐君事業長蔚若頤生
鬚表東海者誰君世有顯儒端委論百揆鞭弭雄
千夫二陳詩禮伯八荀紈綺雛嘗聞達大家可以
濟八區功名望聖世忠孝自吾徒我管拜秦州詞
林炳於菟見謂可與言鋤荒而破觚剗中不宿穢
味道因有腴斯文望若人顛沛一手扶白頭遠綏
邊狐兔安足驅汲黯在朝廷永絕淮南鯁平叔不
鬪羌事正今日須今君撰杖屨還向府中趨問訊

不棄捐寄聲亦疎迂何當質疑義賣劍老樵蘇

曉發樓子莊

曉發樓子莊淮山自茲近春風似惱客浪穩舟不
進長安一回首堤柳千里潤念當整帆席快若冬
蟄奮微生謝拘窘末路嗟鄙吝林花一迎笑岩鳥
相借問塵埃改顏鬢堅白畏緇磷江海慰高情飄
蓬自吾分

禮部移竹次韵李員外文叔

東南之美者見伐以直幹豈如此君疎猶作此郎

玩此郎乃在此無乃材亦散平生吉甫頌意鄙枚

叔亂坐狂得此冷對竹頭幘岸尚思殺青書充宇

白虎觀恐此愧子猷還成倚楹歎

文叔有志史事

次開祖使君韵兼呈端叔大夫聖域長老

神龍異凡馬頭角要須斂邦公七歲時驚耳一語
險悟身非常住風日過河減崢嶸法雲窟跳出有
家範金剛不吐焰已落天魔膽一派感慈中無波
寒湛湛是波本非水無以瓦礫點低枝競聽法草
木有情感作解受羣邪砥硤疑琬琰居然身出定

面目本來儼而我久塵勞見之良內慊周侯老詞
句太華聳而黯自說少苦心脩塗肆窮覽李侯遺
世事不琢元無玷文采麗春葩百牘交千槩顧慙
土炭嗜畏疾非羞儉望不見水端譬河還少貶請
佩伯陽言吾非勇於敢

次韵錢濟明贈感慈長老

我聞棲禪人一念超十地云何別影事未免依緣
氣譬如幻男女機廢根隨廢不然怖頭走此病窮
三世邦公師子吼曾使諸天喜廣說無說時俱成

甘露味不知室久如當有天來侍城隅竹塢近梵
剎開嚴闕以彼穴中空清風自來萃我生久更事
求愚不求慧清風已說法不用重宣偈開祖照人
姿滄波白蘋際居然九奏妙往往魚龍戲濟明經
世才彫松識寒歲懷寶竟迷邦此豈非良計名山
尋勝士投老終深詣我自所蘄廉蟬葉真堪蔽

送八弟无斃宰寶應

窮邦迫秋成霖雨厚土溼遭吾上涑水淖洵三峽
疾邦人送之子岸潦飲馬膝淒淒屬方升澹澹驚

竝集衝湍順塗路游波滙原隰安知禾黍腐轉覺
蛙黽急何由乾此潦問天借九日蕭蕭荆棘晚疊
疊霜霰密之子向南州銅章宰一邑何須念宋遠
古謂跂余及揚舲堤柳盡把醖淮山入封圻吳楚
徼郡縣秦漢襲開門駟僧闕輳浦篙帆翕平旦書
百函交衢客三揖新湖容鼓鑄甲令貴綏輯之子
搴詞科聞詩不讀律古來學爲吏頗自吾儒出足
民與知方求由有政術鞭笞磨鹿駭亦恐日不給
先君卓魯後之子况早立焚香閉閣坐啾耳從漶

泐官忙尚偷閒文字要業岌

和關承議彥遠水樂

上盆五尺高下盆二尺之
咿啾蟻穴間飛瀑一線
響關侯初爲此避世挹蕭爽
晁子亦欣然閉戶穿
瓦盎虛堂一畝靜純白四隅敞
中央渾沌胚儵忽
所求往鑿竅令語言豈但一成兩
危峰下俯瞰石
井黝然仰奔泉決背落慘澹陰
壑想明珠溢盤盂
白露溼塵垝聲音通大道斷竹自
誰賞何曾戛擊
闌餅缶日夜長初疑風隕籜驟雨
來莽蒼乍似酒

落槽夜枕聽惚恍鳴禽雜啁哢物彪亂肝蠻相依
欠林樾見蔽賴帷恍范侯驚側耳李令笑抵掌張
侯助我懶不憶稅歸鞅雲間余仲弟聊可樂吾黨
中和非外物此理未宜罔相勸戒勿傳名字遍天
壤撞鍾鼎食事老罷不知饗但怪一世狂端如轉
車輞能來解幅巾爲子濯泚頰

送君

送君上馬時不道朝鑪燠春風入木心
皮膚發紅綠春風良易算邨得勤行路且莫望南窗胡蝶飛
無數

上馬

上馬笑屬君歸期在十日來時草白芽
歸時青鬱鬱來嗔馬蹄急歸嗔馬蹄緩
人心自如此馬蹄終不變

試院次韵文潛欲知歸期近呈天啓慎思

眉山得張侯心許出一手臨川見蔡子千載慰
邂逅鄧君起南國磊磊看三秀譬如黃鍾陳我尚瓦
釜吼欲知歸期近喚馬牽出廡官壺持餉婦傾寫

不漬口千章輸明堂勿問草澤有羣公自凜凜水
鏡照妍醜

栽花招泗州叔父

春園移春栽芽孽杭粒大東風日日吹噴吐不暇
裏楊梢青猶未桃萼紅尚可田蔬美已最村醅醇
亦頗少年慕立事幸得能幾箇艱難合歸來茅屋
聊共佐

濟北晁先生雞肋集卷第七

濟北晁先生雞肋集目錄

第八卷

古詩

次韵閻秀才漢臣食兔

和蘇翰林題李甲畫雁二首

秋竹

郊居與八弟无斁讀書

用无斁八弟永城相迎韵寄懷

次韵荅葉學古

目一
次韵蘇公和南新道中二首

感懷追和柳子厚郊居歲暮韵

次韵伯温甥池上八首

次韵彦遠相州道中二首

永嘉縣君赴潁州杜丈之喪送至鹿邑境

上贈別

綴古詩語送无斲弟赴舉

贈文潛甥楊克一學文與可畫竹求詩

補樂府三首

豆葉黃

漁家傲

御街行

濟北晁先生雞肋集目錄終

濟北晁先生雞肋集卷第八

古詩

次韵閻秀才漢臣食兔

兔誠中山族中古稍分裂唐虞用大牲雖有目未
瞥翬孫能飛仙飄忽天漢決不逢易牙試厥胃幾
泯滅羿弧殞陽鳥曾不弋在宀王良馬慢忌撲握
幾奔掣初遭趙趙子鼎飪飪毛皿中逢宋鵲窘飢
吻啄原雪叔世削格多星迸失行列蹄窮不得逸
如鼠限高闌應憐蚌潛水暴腹想江月脣亡欲誰

語竟死猶結舌肩尻弱易解狼藉腥尺鐵抽毫置
筠管復苦蠹魚齧論功在冊府微物推爾傑剡藤
光奪縑抄記良瑣屑北鄰閭夫子尚忍資盃啜得
諸韓盧口實以彊暴劣作詩誇芳美此譽寧所悅
不如狐膏臊質賤甘棄絕豕妖老通數藤索夜空
設爾曾不及彼就獲徒內熱聆聲無聳耳當學縮
頸鼈吾君阜萬物沛若澤未竭誰能復古初此味
儻可缺

和蘇翰林題李甲畫雁二首

畫寫物外形要物形不改詩傳畫外意貴有畫中
態我今豈見畫觀詩雁真在尚想高郵間湖寒沙
璀璨冰霜已凌厲藻荇良瑣碎衡陽渺何處中沚
若煙海

蕭條新湖秋霜落洲渚潔蓮垂蘭杜死菖蒲見淡
節慘澹沙礫姿清波侶羣鴨往時吳興守看畫憶
茗雪爲儀尚不污孤高比雲月聞在雪堂時滿堂
唯畫雪

秋竹

秋風多煩寃竹是歲寒物朝寒堦玲瓏暮寒堦
邱勿翻然下一葉未覺瘦齒峯豈無陳根旁寂莫衆
頭屈何時雷填填看爾射地出

郊居與八弟无斃讀書

坐狂得世捐作官故不了十年未弛負半世不黔
竈居然顏玉雪及是鬢蓬葆碧山已焚魚白水初
種稻瓜區可淡隱圭竇便却埽之子懷世資行脩
名譽好避人本愉恬坐我亦枯槁无斃以余故得監廟頃求
田野處政以城郭擾常時啜此別幸爾晏言笑如

蘭豈異臭覆瓿本均好

去聲

不懲范釜塵尚作韓編

盜斲輪元戒疾紵絮非病少莞爾勸之休怡然守
而嫪翻息南遷久祗幸北歸早三已令奚愠四至
卿誠巧所欣顛木葉莫羨姣人瞭同氣靡間言它
人闕忠告貧居無酒肉窮巷有揆討葵作飽蓬蓬
茗澆憂悄悄長閑味更永競進念已勦目鴻天蒼
蒼夢蝶日杲杲蘅皋美新雨藜杖邈高蹈營齋直
新徑創檻俯幽沼架以我園檀茨之子宫草无斃月給
也優游聊卒歲邂逅可同調佩玉子終翔菟裘我

方老囊中餐玉法櫪上追風驃能知面不覩未用
心如攪平生夔契慕晚歲瞿聃妙但欲入林溪子
來應問道

用无斃八弟永城相迎韵寄懷

平生殫千金術似劉累僻春風九軌道無我迷陽
跡呼來著冠紉野貌不改昔易衣憐介弟猶有布
一尺身慙崔浩短胸次儼列戟中天翥鸞鳳我自
無六翮何曾客權貴見謂貧盜壁堂堂涑水翁我
在此人籍不詆曲江賢寧羞九年謫艱難累吾母

鬢髮白一夕獨此負吾心敢言忠抱石方時半千
運異晉陽九厄譬馳羊腸坂雙任臣子責帝王所
張弛乾坤有闔闢君敷皇極言人詠蓼蕭澤鳶魚
競飛躍風俗凜移易已開公府閤又置四郊驛摻
求逮田野欣喜到僮役雖微攜手上頗似破笈釋
川塗見吾弟薪木詢我宅憐君如我固不歎玄尚
白薄飲盡餘醅凝塵振鹿席我醉易成狂欲起須
君掖

次韵荅葉學古

四
咎我遊武林值子長江頭我時方南轅子亦將西
舟相見兩大笑典衣上高樓樓高不知暑五月凝
清秋環觀四山明俯視萬井稠喧喧市中人日暮
歌吹浮忘形與子飲一醉餘無謀湖上荷花生黃
鸝飛柳洲翻然搖兩槳下上逐輕鷗不覺脫塵世
自謂逍遙遊晚訪城隅寺竹林森如幃斫薪煮山
茗蕭洒破百憂腳懶厭屢闌五日成淹留肅肅太
史家門闌閑且幽荒亭蔭疎桐雀鬪聞啾啁其人
絕世賢擲揄困時流唯我與吾子大軸更往投幸

聞一諾榮不受萬戶侯誰言王母桃方朔不得偷
未幾子告別西賓帝王州吳船風雨夜送子不勝
愁八月子獻書高談夏商周惜哉天下馬驪牡煩
推求我濫鄉老薦麻衣望前旒愧非鳴鳳祥斥去
還林丘三月我度江子行窮海陬相望遂乖隔慨
歎不自休逆旅善辱人虛激韓娥謳操瑟立齊門
乃反怨不收嗟哉子與我不幸斯人儔有客道閩
吳書詩眷綢繆開緘恍自失但覺膽氣適有如飲
貪泉海貨溢兩眸子詩益加富我句猶能裒春禽

與秋蟲引腹聊相酬

次韵蘇公和南新道中詩二首

山園芙蓉開寂莫歲云晚公來無與同念我百里
遠寒飈吟空林白日下重巘興盡還獨歸挑燈古
囊滿

讀公棲鴉詩歲月傷晚晚公胡不念世蠟屐行避
遠羈鳥翔別林歸雲抱孤巘我才不及古歎息襟
淚滿

感懷追和柳子厚郊居歲暮韵

殘暑夜如炊曉風吹蕭索開門望林木引蔓修籬
落所欣塵累遠不恨生涯薄心事少干雲白頭成
憶昨

次韵閻甥伯溫池上八首

文饒論百揆豪氣闊天宇歸來坐平泉草木何足
數只今和文弟怪石幾風雨達生要忘累人取應

我與

李和文家涼堂後石甚奇上刻平泉字蓋文饒自題也

昔吾卜城東今吾卜城中祗畏盜賊迫安知塵市
同畚鍤運渤海操蛇應未窮無乃遭此笑君如北

山翁

誅茅斬惡木衆卉方以朋掘沙到沮洳方復見此
澄客來恍異境物象初不增以此自誑目果下能
日藥

池淡不可臨際水作石磴塵埃攪百里得此亦差
勝晨朝看雨坐蛙喜律呂應有兒不鼓篋共此疎
懶興

物養有得失瘠地江河隈亭檻但小草山林自奇
材我有八極興聊堪一席開長嘯本造適悲風爲
誰來

自從移居來城市益啾擾如何跬步近亦有鷺下
沼竭來欲騁驚詰曲故百遶人間南柯夢方此猶
復小

黃冠一奇士教我漱華池茅檐夕堅坐見月柳間
低水蟲時一出細浪作鱗差流觀起百慮內視失
羣疑

平生惟親舊相得懷抱敞寧知老田里三徑得還
往結廬在人境此意陶令賞但話北窗涼何必義

皇上

次韵彦遠相州道中二首

自君之出矣吾居關晝橫尚有楊李來時能出門
迎少日所忿愒壯年瞖雙睛涉月在一床幾成小
冠盲夫子竹林趨世固溷高明尚喜鞍馬間經阿
復緣泓詩隨晚雨墮迫戶有餘清便擬釀白黍相
邀飭青精重惜吾楊李徂秋各南征

朝入一几縱算入一几橫黃卷值咎人歡與相逢
迎孫子謝口語阮生勞目睛登亦豈必暗籍猶未
能盲學非經世具所貴自知明仁義有不然失時
悲戰泓一生屐幾量況欲埃河清動與道彌遠靜
於理逾精君能問舍往吾亦賣刀行

永嘉縣君赴潁昌杜丈之喪送至鹿邑境上

贈別

二十年糠粃相從無覲顏尊公抱至痛白玉掩深
菅送子三百里西風涕洟瀾鄰喪罷相舂況我五
服間憐子一女子忘身赴憂患但恨莫攀輻賤生
守微官勿爲搯執悲我居不求安送死當大事丈

夫良獨難

綴古詩語送无斃弟赴舉

鮮民之生靡瞻匪父母氏劬勞寧不我顧兄弟無
遠惟予與女執子之手此夕何夕我心蘊結兮嗟
予弟行役二之日栗烈飄風發發子之清揚麻衣
如雪載馳載驅出宿於干揆之以日體无咎言旣
差我馬遠送于野敦彼獨宿于林之下無衣無褐
不念咎者陟彼高岡或降于阿瞻望弗及獨寐晤
歌展轉反側不平謂何顯允君子洵美且異溫其
如玉于祿豈弟春日載陽薇亦作止睍睍黃鳥嚶
其鳴矣

贈文潛甥楊克一學文與可畫竹求詩

與可畫竹時胸中有成竹經營似春雨滋長地中
綠興來雷出土萬籜起崖谷君今似與可神會久
已熟吾觀古管葛王霸在心曲遭時見毫髮便可
驚世俗文章亦技爾詎可枝葉續穿楊有先中未
發猿擁木詞林君張舅此理妙觀燭君從問輪扁
何用知聖讀

補樂府三首

荳葉黃

蒹葭蒼荳葉黃南村不見岡北村十頃彊東家車
滿箱西家未上塲荳葉黃野離離鼠窟之兔入畦
豕母從豚兒豕啼豚咿咿銜角復銜其荳葉黃穀
又熟翁媪衰舖糜粥荳葉黃葉黃不獨荳白黍堪
作酒瓠大棗紅皺荳葉黃穰穰何膻膻腰鎌獨健
婦大男往何許官家教弓刀要汝殺賊去

漁家傲

漁家人言傲城市未曾到生理自江湖邨知城市
道晴日七八船熙然在清川但見笑相屬不省歌
何曲忽然四散歸遠處滄洲微或云後車載藏去
無復在至老不曲躬羊裘行澤中

御街行

雙闕齊紫清馳道直如線煌煌塵內客相逢不相
見上有高槐枝下有清漣漪朱欄夾兩邊貴者中
道馳借問煌煌子中道誰行此且復就下論驄馬
知雜事官卑有常度邨得行同路相効良獨難且

復東西去

濟北晁先生雞肋集卷第八